

## SAMNINGUR

### Akureyrarbæjar og Langanesbyggðar, Norðurþings, Tjörneshrepps og Þingeyjarsveitar um Barnaverndarþjónustu Eyjafjarðar.

#### 1. gr.

##### *Umdæmi barnaverndarþjónustu Eyjafjarðar.*

Sveitarfélögin Akureyrarbær, Dalvíkurbyggð, Eyjafjarðarsveit, Grýtubakkahreppur, Hörgársveit, Langanesbyggð, Norðurþing, Svalbarðsstrandahreppur, Tjörneshreppur og Þingeyjarsveit reka saman Barnaverndarþjónustu Eyjafjarðar. Um þjónustuna gilda þrír samningar. Í fyrsta lagi á milli Akureyrarbæjar og Dalvíkurbyggðar, sbr. fylgiskjal I. Í öðru lagi milli Akureyrarbæjar og Eyjafjarðarsveitar, Grýtubakkahrepps, Hörgársveitar og Svalbarðsstrandahrepps, sbr. fylgiskjal II og í þriðja lagi milli Akureyrarbæjar og Langanesbyggðar, Norðurþings, Tjörneshrepps og Þingeyjarsveitar. Ástæða þess er að Dalvíkurbyggð og Norðurþing heldur áfram barnaverndar starfsfólki sínu og mynda þau nú sameiginlegt barnaverndarteymi ásamt starfsmönnum barnaverndar Akureyrarbæjar. Eyjafjarðarsveit, Grýtubakkahreppur, Hörgársveit og Svalbarðsstrandahreppur hafa haft sameiginlega barnavernd með Akureyrarbæ og því ekki með starfsfólk hjá sér. Langanesbyggð, Tjörneshreppur og Þingeyjarsveit hafa haft sameiginlega barnavernd með Norðurþingi, þar sem Norðurþing var leiðandi sveitarfélag og því voru þau ekki með starfsfólk í barnavernd hjá sér. Norðurþing hættir með samningi þessum að vera leiðandi sveitarfélag í barnaverndarþjónustu og fellur því þjónustusamningur sveitarfélaganna niður. Starfsmenn Norðurþings í barnavernd munu þó áfram þjónusta svæði Langanesbyggðar, Tjörneshrepps og Þingeyjarsveitar en undir stjórn barnaverndarþjónustu Eyjafjarðar.

Kostnaðarforsendur sveitarfélaganna eru því ekki þær sömu. Í öllum þremur samningunum er Akureyrarbær leiðandi sveitarfélag og fer með yfirstjórn barnaverndarþjónustunnar.

Samkvæmt Hagstofu Íslands þann 1. janúar 2023 var sameiginlegur íbúafjöldi þessara tíu sveitarfélaga 29.815 manns. Framangreind sveitarfélög mynda sameiginlegt umdæmi á norðurlandi eystra um barnaverndarþjónustu og uppfylla skilyrði 1. mgr. 11. gr. barnaverndarlaga um lágmarks íbúafjölda. Þjónustusvæðið er ekki sjálfstæður lögaðili.

Framangreind sveitarfélög eru öll aðilar að samningi um rekstur umdæmisráðs Landsbyggða, sem gerður var með vísan til 14. gr. barnaverndarlaga nr. 80/2002.

#### 2. gr.

##### *Aðild, lagagrundvöllur og leiðandi sveitarfélag.*

Með samningi þessum gera Akureyrarbær og Langanesbyggð, Norðurþing, Tjörneshreppur og Þingeyjarsveit með sér samning um sameiginlegt þjónustusvæði í barnavernd gegn greiðslu, sbr. 4. gr. samnings þessa.

Samningur þessi er gerður með vísan til 10., 11. og 12. gr. barnaverndarlaga nr. 80/2022 þar sem fjallað er um umdæmi barnaverndarþjónustu og 96. gr. sveitarstjórnarlaga nr. 138/2011. Við útreikninga skv. 4. gr. samnings þessa er tekið mið af íbúafjölda hvors sveitarfélags miðað við 1. janúar ár hvert.

Samningur þessi tekur gildi 1. júní 2024, að fenginni staðfestingu sveitarstjórna aðildarsveitarfélaga og mennta- og barnamálaráðherra. Akureyrarbær er leiðandi sveitarfélag í umdæminu í skilningi 96. gr. sveitarstjórnarlaga nr. 138/2011.

Samningsaðilar skuldbinda sig til þess að hafa gagnvirkt samráð um ákvarðanir innan þessa samstarfs sem hafa áhrif á fjárhagslegar skuldbindingar aðildarsveitarfélaganna eða leiða til verulegra breytinga á veittri þjónustu í málaflokknum.

Akureyrarbær ber ábyrgð á Barnaverndarþjónustu Eyjafjarðar sbr. barnaverndarlög nr. 80/2002. Akureyrarbær ber jafnframt ábyrgð á fullnaðarafgreiðslu barnaverndarmála á starfssvæði samningsins. Yfirmaður Barnaverndarþjónustu Eyjafjarðar er forstöðumaður barnaverndarþjónustu á velferðarsviði Akureyrarbæjar. Aðildarsveitarfélögin bera ábyrgð á að hafa á að skipa hæfu starfsfólki, sbr. barnaverndarlög nr. 80/2002, vegna vinnslu mála hjá barnaverndarþjónustunni í heild. Það starfsfólk lýtur ákvörðunarvaldi Akureyrarbæjar í þeim málum sem heyra undir samning þennan.

Sveitarstjórnir samningsaðila hafa staðfest samþykkt þar sem vald til fullnaðarafgreiðslu mála samkvæmt barnaverndarlögum er falið tilgreindum starfsmönnum Barnaverndarþjónustu Eyjafjarðar auk umboðs til könnunar, meðferðar og ákvarðanatöku í barnaverndarmálum og öðrum málum þar sem barnaverndarþjónusta fer lögum samkvæmt með ákvörðunarvald, sbr. samþykkt um fullnaðarafgreiðslu barnaverndarmála hjá Barnaverndarþjónustu Eyjafjarðar, með vísan til 3. mgr. 12. gr. barnaverndarlaga nr. 80/2002, sem eru ófrávíkjanlegur hluti af samningi þessum. Ekki er þörf á staðfestingu á ákvörðun um framkvæmd verkefnis með vísan til 6. liðar 4. mgr. 96. gr. sveitarstjórnarlaga nema þess sé sérstaklega getið í samningi þessum.

Það er sameiginlegur vilji aðildarsveitarfélaganna að jafnræðis sé gætt í vinnu með börnum og fjölskyldum þeirra óháð búsetu þeirra.

### 3. gr.

#### *Verkefni Barnaverndarþjónustu Eyjafjarðar.*

Með samningi þessum um Barnaverndarþjónustu Eyjafjarðar felur Langesbyggð, Norðurþing, Tjörneshreppur og Þingeyjarsveit, Akureyrarbæ að annast fyrir sig verkefni barnaverndarþjónustu samkvæmt 10. gr. barnaverndarlaga nr. 80/2002. Fagleg ábyrgð og ákvarðanatöku er hjá Akureyrarbæ, sbr. 96. gr. sveitarstjórnarlaga nr. 138/2011. Starfsfólk Norðurþings lýtur boðvaldi Akureyrarbæjar í málum sem heyra undir samninginn.

Barnaverndarþjónusta Eyjafjarðar undirbýr og fer fram á úrskurð umdæmisráðs vegna mála sem lúta úrskurðarvaldi ráðsins.

Barnaverndarþjónusta Eyjafjarðar setur reglur um veitingu fjárstyrks vegna málsmeðferðar til greiðslu lögmannsaðstoðar, sbr. 47. gr. barnaverndarlaga nr. 80/2002. Lögheimilissveitarfélag málsaðila greiðir styrkinn.

Yfirmenn barnaverndar í sveitarfélagi Akureyrarbæjar, Dalvíkurbyggðar og Norðurþings mynda svokallað fagråd Barnaverndarþjónustu Eyjafjarðar. Fagráðið er samstarfsvettvangur til að móta og aðlaga verklag við afgreiðslu mála í samræmi við lög, reglugerðir og gæðaviðmið á hverjum tíma sem þjónustan fellur undir. Starfsemi fagráðsins er á ábyrgð Akureyrarbæjar. Ef breytinga er þörf á t.d. regluverki skal málið fara til umsagnar til velferðarráðs Akureyrarbæjar, félagsmálaráðs Dalvíkurbyggðar og félagsmálanefnd Norðurþings. Þau ráð/nefnd fjalla einnig um stefnumótun þjónustunnar, almennan rekstur, starfsáætlun, rekstraryfirlit sem og fjárhagsáætlun.

Akureyrarbær, Dalvíkurbyggð og Norðurþing leggur til sérhæft starfsfólk sem kemur að meðferð barnaverndarmála á viðkomandi svæði. Starfsfólk lýtur yfirstjórn og ábyrgð Akureyrarbæjar í málum er heyra undir barnaverndarþjónustuna.

Starfsfólk barnaverndar Akureyrarbæjar, Dalvíkurbyggðar og Norðurþings mynda barnaverndarteymi sem annast barnaverndarþjónustu og ráðgjöf á grundvelli barnaverndarlaga.

Starfsfólk barnaverndarþjónustu annast móttöku á barnaverndartilkynningum og skráningu þeirra í sameiginlegan barnaverndargrunn og annast úrvinnslu þeirra í samráði við yfirmann barnaverndarþjónustu. Notast verður við sameiginlegan barnaverndargrunn fyrir aðildarsveitarfélögin þar til sameiginlegur gagnagrunnur Barna- og fjölskyldustofu er tilbúinn. Fram að því ber yfirmaður barnaverndar Akureyrarbæjar ábyrgð á því að gögnum sé deilt og þau varðveitt á öruggan hátt í samræmi við ákvæði laga um persónuvernd og vinnslu persónuupplýsinga nr. 90/2018.

Barnaverndarteymi heldur að jafnaði tvo fundi í viku, tilkynningarfund og meðferðarfund. Yfirmaður barnaverndarþjónustu Akureyrarbæjar ber ábyrgð á og stýrir fundunum. Fundirnir eru til þess að ákvarða málsmeðferð og taka ákvarðanir í einstaka málum sem starfsfólk framfylgir.

Fundina sitja starfsfólk barnaverndarþjónustu og eftir atvikum lögfræðingur velferðarsviðs Akureyrarbæjar.

Aðildarsveitarfélögin halda úti sitthvoru bakvaktarfyrikomulaginu en eru sammála um að ef af einhverjum ástæðum ekki næst á bakvaktarstarfsmanni í einhverju aðildarsveitarfélaganna þá geti lögregla og/eða 112 hringt í bakvaktanúmer hinna aðildarsveitarfélaganna.

#### 4. gr.

##### *Kostnaðarskipting.*

Sérkostnaður hvers aðildarsveitarfélags:

- a. Allur kostnaður vegna úrræða og stuðnings, þar með talið sérfræðikostnaður, sálfræðiþjónusta, málskostnaður á æðra dómstigi o.fl.
- b. Kostnaður vegna mála sem tekin eru fyrir í umdæmisráði.
- c. Kostnaður vegna bakvakta og útkalla.

Sameiginlegur kostnaður sem skiptist eftir íbúafjölda aðildarsveitarféлага:

- a. Stjórnsýsla er snýr að barnaverndarþjónustunni.
- b. Ábyrgð og ákvarðanatöku yfirmanns barnaverndarþjónustu.
- c. Lögfræðiþjónusta í barnaverndarþjónustu, þ.e. ráðgjöf, framfylgd mála vegna ákvarðana umdæmisráðs Landsbyggða, dómsmál á fyrsta dómstigi og fl. eftir atvikum.

Fyrir þjónustuna á árinu 2024 greiðir Norðurþing Akureyrarbæ 4.618.169 krónur. Greiðslan er hlutfall af áætluðum kostnaði vegna yfirstjórnar barnaverndar og sameiginlegum kostnaði vegna sjö mánaða á árinu 2024 og byggir á fyrirliggjandi kostnaðaráætlun, sem sýnir útskiptingu á kostnaði allra sveitarfélaganna sem koma að barnaverndarþjónustunni á svæðinu.

Akureyrarbær sendir Norðurþingi reikning vegna þjónustunnar í tvennu lagi, í júlí og október. Þá sendir Norðurþing reikning á Langanesbyggð, Tjörneshrepp og Þingeyjarsveit vegna þessa sameiginlega kostnaðar á yfirstjórn þjónustunnar sem skiptist hlutfallslega miðað við íbúafjölda. Norðurþing greiðir 60,7%, Langanesbyggð greiðir 11,4%, Tjörneshreppur greiðir 1,2% og Þingeyjarsveit greiðir 26,8%

Greiðslan er byggð á áætlun um kostnað við þjónustuna. Verði veruleg breyting á kostnaði, meira en 3% frávik, frá áætlun má taka upp kostnaðarskiptinguna.

Greiðsla vegna þjónustunnar skal endurskoðuð ár hvert miðað við íbúafjölda skv. Hagstofu Íslands í janúar ár hvert.

#### 5. gr.

##### *Úrsögn sveitarfélags.*

Ákveði sveitarfélag að hætta aðild að Barnaverndarþjónustu Eyjafjarðar skv. samningi þessum skal viðkomandi sveitarfélag tilkynna það með skriflegum hætti til Akureyrarbæjar með 12

mánaða fyrirvara. Tekur úrsögn þá gildi við næstu mánaðarmót að liðnum 12 mánuðum frá uppsögn, að því gefnu að sveitarfélagið hafi greitt allan þann kostnað sem því ber, sbr. 4. gr. samnings þessa.

6. gr.

*Endurskoðun.*

Fagráð Barnaverndarþjónustu Eyjafjarðar skal með reglubundnum hætti endurskoða samning þennan og telji það þörf á endurskoðun skal unnið að breytingartillögum og málið lagt fyrir velferðarráð Akureyrarbæjar, félagsmálaráð Dalvíkurbyggðar og félagsmálanefnd Norðurþings, auk annarra aðila að samstarfinu.

Þá geta einnig aðrir samningsaðilar samnings þessa óskað eftir endurskoðun á samningnum ef samningsforsendur breytast. Skal slíkt erindi sent skriflega til Akureyrarbæjar. Sviðsstjóri velferðarsviðs Akureyrarbæjar boðar til fundar með öðrum samningsaðilum. Sé talin þörf á endurskoðun skal unnið að breytingartillögum og málið lagt fyrir velferðarráð Akureyrarbæjar, félagsmálanefnd Norðurþings og sveitarstjórnir Langanesbyggðar, Tjörneshrepps og Þingeyjarsveitar, auk annarra aðila að samstarfinu.

Ef þörf er á breytingum á samningi þessum skal málið lagt fyrir allar sveitarstjórnir samningsaðila að Barnaverndarþjónustu Eyjafjarðar í tvígang auk þess skal óska eftir staðfestingu viðeigandi ráðuneytis, sbr. 18., 93. gr. sveitarstjórnarlaga nr. 138/2011.

7. gr.

*Meðferð ágreiningsmála.*

Rísi ágreiningur vegna samnings þessa skulu aðilar reyna sættir, en reynist nauðsynlegt að reka mál vegna samningsins skal það rekið fyrir Héraðsdómi Norðurlands eystra.

8. gr.

*Gildistaka.*

Samningur þessi tekur gildi við birtingu hans í stjórnartíðindum eða eigi síðar er 1. júní 2024.

Samningur þessi er tímabundinn og gildir til 31. desember 2024. Haldinn skal fundur meðal samningsaðila, eigi síðar en 15. október til að meta samstarfið. Akureyrarbær skal boða til fundar með mánaðar fyrirvara þar sem samstarf sveitarfélagana skal rætt, sem og hugsanlegar breytingartillögur verða bornar upp og ræddar og samningurinn endurnýjaður eftir atvikum. Um málsmeðferðina gildir 6. gr. samnings þessa.

Af samningi þessum eru gerð sex samhljóða eintök, eitt handa hverjum samningsaðila og eitt til ráðuneytisins í samræmi við 93. gr. sveitarstjórnarlaga nr. 138/2011.

Þannig samþykkt:

Í bæjarstjórn Akureyrarbæjar	dags.	7. maí 2024
Í sveitarstjórn Langanesbyggðar	dags.	17. apríl 2024
Í sveitarstjórn Norðurþings	dags.	2. maí 2024
Í sveitarstjórn Tjörneshrepps	dags.	18. apríl 2024
Í sveitarstjórn Þingeyjarsveitar	dags.	24. apríl 2024

